

Na temelju članka 10. stavka 5. i 84. točka 1. Zakona o veterinarstvu u Bosni i Hercegovini („Službeni glasnik BiH“, broj 34/02), Ured za veterinarstvo Bosne i Hercegovine donosi:

NAREDBU
o ograničavanju prometa i kretanja goveda, ovaca i koza u Bosni i Hercegovini

I

1. Radi sprječavanja širenja zarazne bolesti bruceloze promet goveda, ovaca i koza na području Bosne i Hercegovine može se odvijati samo:
 - a) ako se prijevoz-transport vrši prijevoznim-transportnim sredstvima,
 - b) ako životinje posjeduju uvjerenja o zdravstvenom stanju životinja i ako su obilježene ušnim markicama (za goveda propisane jedinstvene za cijelu BiH, a za ovce i koze odobrene od strane nadležnog organa entiteta i Brčko distrikta BiH, u skladu sa Pravilnikom za označavanje životinja i šemi kontrole kretanja životinja u Bosni i Hercegovini („Službeni glasnik BiH“, broj 28/03),
 - c) ako ovce i koze posjeduju rješenje nadležnog veterinarskog inspektora o statusu posjeda sa kojeg životinje potječu.
2. Kretanje (vlastitim nogama odnosno sezonska ispaša) goveda, ovaca i koza omogućeno je samo na teritoriji opštine boravka životinja uz provođenje propisanih veterinarskih mjera za navedene životinje.

II

1. Životinje koje se nađu izvan stalnog mjesta boravka bez dokumentacije navedene u tački I stav 1. primijenit će se sljedeće mjere:
 - a) sve zatečene životinje podvrgnuti karantenskom tretmanu u terenskim uvjetima (ogradi ih ili dovesti u najbliže uvjete za sprovođenje karantenskih mjera),
 - b) sve životinje dijagnostički pretražiti na brucelozu.
2. Životinje za koje se utvrdi da su sero-negativne biti će upućene u mjesto stalnog boravka isključivo prijevoznim-transportnim sredstvima uz izvještaj nadležnog veterinarskog inspektora o provedenim dijagnostičkim pretragama, a sero-pozitivne životinje će se neškodljivo uništiti ili ekonomski iskoristiti u skladu sa važećim propisima.
3. Vađenje krvi vršit će veterinarska organizacija na čijem su epizotiloškom području životinje zatečene.
4. Troškove nastale provođenjem propisanih aktivnosti u ovoj naredbi snosi vlasnik životinja.

III

1. Otpremanje životinja na klanje može se obavljati samo ako pošiljku prati:
 - a) uvjerenje o zdravstvenom stanju životinja kojim se potvrđuje da su životinje zdrave, da ne potiču sa imanja na kojem vlada zarazna bolest koja se može prenijeti sa predmetnim životinjama i da su na životinjama sprovedene sve propisane zdravstvene mjere,
 - b) VS obrazac u kojem nadležni veterinarski inspektor, pored ostalog obavezno navodi registarski broj transportnog sredstva, datum i vrijeme utovara i podatke o klaonici na koju se životinje otpremaju,
 - c) potvrdu nadležne veterinarske organizacije da je prije utovara izvršeno čišćenje, pranje i dezinfikovanje prevoznog-transportnog sredstva.
2. Subjekti koji vrše pečenje jagnjadi i jaradi za vlastite ugostiteljske potrebe ili za treća lica moraju prethodno izvršiti klanje jagnjadi i jaradi u registrovanim klaonicama i o tome posjedovati dokumentaciju izdatu od nadležnog veterinarskog inspektora i otpremnicu sa fakturom izdatom od klaonice. Na trupovima zaklanih jagnjadi i jaradi mora biti veterinarski žig na kojem se jasno vide tekst i broj kao i datum klanja životinje.

IV

Odredbe ove naredbe ne odnose se na pošiljke životinja iz uvoza koje moraju udovoljavati posebnim uvjetima propisanim *Odlukom o uvjetima uvoza i provoza živih životinja, proizvoda i namirnica životinjskog podrijetla, lijekova, stočne hrane i otpadaka u Bosnu i Hercegovinu („Službeni glasnik BiH“, broj 17/04)* i *Rješenja o nepostojanju veterinarsko-zdravstvenih smetnji za uvoz* koje izdaje Ured za veterinarstvo BiH.

V

1. Nepoštovanje odredbi ove naredbe kažnjivo je po čl. 93. do 97. Zakona o veterinarstvu u Bosni i Hercegovini („Službeni glasnik BiH“, broj 34/02).
2. Nadležna veterinarska inspekcija u Republici Srpskoj, Federaciji BiH i Brčko distriktu BiH obvezna je osigurati provođenje odredbi ove naredbe.

VI

Ova naredba stupa na snagu danom donošenja, a objavit će se u „Službenom glasniku BiH“.

DIREKTOR
Ureda za veterinarstvo BiH

Broj, 01-1-02-519/08
Sarajevo, 24.04.2008.

Dr.Sc. Drago N. Nedić